

## **BAB I**

### **PURWAKA**

Panliten ing bab siji iki bakal ngandharake lelandhesane panliten, wewatesane panliten, underane panliten, tujuwane panliten, paedahe panliten, lan panjlentrehe tetembungan. Lelandhesane panliten mujudake sub bab kang bisa dadi wadhah anggone panliti milih topik kang dijlentrehake, dene anane underane panliten mujudake bab-bab kang bakal dijlentrehake dening panliti.

Tujuwane panliten ngandharake wangsulan-wangsulan kang trep tumrap pitakonan-pitakonan panliten kasebut, dene paedahe panliten digunakake kanggo nggoleki kahanan lan *konsekuensi* tumrap kahanan tartamtu sajrone panliten. Wewatesane panliten nduweni guna supaya panliten kang ditindakake bisa kapunjer marang bab kang bakal dijlentrehake. Panjlentrehe tetembungan diajab supaya ora kliru anggone ngerteni tetembungan kang digunakake ing panliten iki.

#### **1.1 Lelandhesane Panliten**

Saben wong wadon nduweni kepinginan kanggo nindakake apa kang dadi kepinginane nanging kadhang kala ana wae perkara kang ndadekake wong wadon ora bebas nindakake apa kang dadi kepinginane. Babagan kasebut amarga anane pamawas yen wong wadon ora luwih kuwat tinimbang wong lanang saengga ndadekake wong wadon ora bisa bebas kaya wong lanang. Anane pangrembakan jaman ndadekake anane owah-owahan kanggo nuntut kabebasan kanggo para wong wadon. Salah sawijine gerakan kanggo nuntut kabebasan para wong wadon yaiku gerakan feminis utawa feminisme.

Feminisme iku dhewe nduweni tujuwan kanggo nyeimbangake *gender*. *Gender* kang dimaksud yaiku *gender*

antarane wong lanang lan wong wadon, saengga bisa ditegesi yen feminisme yaiku gerakan kaum wanita kanggo nolak sakabehane wujud diasorake dening kabudayan kang wis ana sajrone bidhang politik, ekonomi, lan sajrone panguripan (Ratna, 2013:84). Miturut Hari (sajrone Darni, 2013:2), anane dheskriminasi tumrap wong wadon lan anane pandhangan kang asor tumrap wong wadon ndadekake wong wadon nuntut anane pepadhan hak ing bidhang ekonomi, hukum, sosial, lan budaya. Faktor utama kang njalari anane gerakan feminisme yaiku saka akehe pawongan kang ngremehake wong wadon saengga wong wadon dadi kaum kang ora bebas, wong wadon minangka objek kang ora bisa nduweni pamikiran dhewe. Babagan kasebut wis dadi crita kang ana sajrone panguripane masyarakat yen wong wadon iku swarga nunut neraka katut. Tegese yen bojone nduweni panguripan kang kepenak, wong wadon minangka sisihane uga bakal ngrasakake urip kang kepenak. Yen wong lanang uripe ora kepenak, wong wadon kang dadi sisihane uga bakal nandang kesedhihan.

Topik ngenani kabebasan tumrap wong wadon pancen topik kang paling narik kawigaten pamaca amarga topik iki bisa menehi piwulang supaya pamaca bisa ngerteni yen kabebasan lan pepadhan hak iku wigati banget tumrap sapa wae utamane wong wadon kang dadi kaum kasisih utawa kaum *marginal*. Topik ngenani kabebasan wong wadon ana sajrone novel kanthi irah-irahan *Para Pawestri Pejuwang* anggitané Suparto Brata. Novel iki nyritakake para wong wadon kang dadi paraga utama bisa nglawan tindhak dheskriminasi nalika Indonesia lagi gegeregegere krisis ekonomi.

Suparto Brata minangka salah sawiji sastrawan Jawa kang misuwur amarga asil reriptan sastrane ora mung awujud sastra Jawa nanging uga sastra Indonesia. Karya sastrane Suparto Brata kang ngandhut unsur feminisme yaiku *Kremil, Gadis Tangsi,*

*Asmarani, Astirin Mbalela*, lan uga kalebu *Para Pawestri Pejuwang*. Saliyane novel-novel ing ndhuwur iku, Suparto Brata uga ngripta novel kanthi irah-irahan *Kaum Republik* kang dipacak ing Panjeban semangat taun 1959, novel *Tanpa Tlacak, Katresnan kang Angker*, lsp.

Topik ngenani kabebasan tumrap wong wadon uga dicritakake sajrone novel *Cerita Cinta Enrico* anggitané Ayu Utami. Karya Ayu Utami luwih wani ngandharake perspektif feminisme lumantar crita ngenani kabebasan seks kang ditindakake dening wong wadon. Ayu Utami diarani sastrawan kang wani nglawan kahanan-kahanan kang dianggep tabu lan kahanan kang dianggep tabu kasebut wis dadi kahanan kang dianggep biyasa sajrone panguripane masyarakat kanthi anane konvensi budaya kang dadi panyengkuyunge. Akeh kang ngarani yen asil reriptan karya sastrane luwih ngandharake panguripane paraga wanita lumantar seks lan agama, mula ana kang ngarani yen dheweke minangka tokoh feminisme (Wiyatmi, 2012:110). Novel reriptane Ayu Utami wis akeh banget, limang novele kang kawentar yaiku *Saman, Larung, Si Parasit Lajang, Bilangan Fu*, lan *Manjali dan Cakrabirawa*, sarta ora liya *Cerita Cinta Enrico* (Utami, 2012:243-244). *Cerita Cinta Enrico* iku dhewe nyritakake wong wadon minangka wong wadon kang maju pamikirané uga kang modheren tampilane ora kaya wanita liyané ing jaman semana.

Ana bab-bab kang narik kawigaten saka rong novel kasebut yaiku anane perangan-perangan kang padha lan perangan-perangan kang beda sajrone rong novel kasebut. Pepadhane yaiku nyritakake wanita kang ora gelem dadi kaum kang didheskriminasi tumrap wong lanang, saliyané kuwi novel iki padha-padha ngandharake kepriye lelakone paraga wanita sajrone panguripan. Rong novel kasebut nduweni latar belakang kang padha yaiku disambungake karo kedadeyan wigati ing

jaman mbiyen lan saiki dadi sejaraha Indonesia. Bab kang njalari beda kang kapisan yaiku pangripta kaloro novel kasebut kang beda. Novel kanthi irah-irahan *Para Pawestri Pejuwang* (sabanjure dicekak PPP) iki dianggit dening Suparto Brata lan novel *Cerita Cinta Enrico* (sabanjure dicekakak CCE) dianggit dening Ayu Utami. Basa novel kang diripta dening Suparto Brata yaiku nggunakake basa Jawa, dene novele Ayu Utami nggunakake basa Indonesia.

Dhasar pamikiran sajrone panliten sastra kang nduweni perspektif feminisme yaiku upaya kanggo ngerteni kalungguhan lan *peran* wanita sajrone karya sastra. Kalungguhan lan *peran* para paraga wanita sajrone karya sastra kudu dingerteni kanggo ngonceki perkara ngenani ketimpangan *gender* sajrone karya sastra (Suharto, 2013:15). Mula saka iku, panliten iki bakal ngrembug ngenani kalungguhane paraga wanita sajrone rong novel kasebut. Novel Jawa lan Indonesia iki bakal dikaji isine nggunakake sastra bandhingan kanthi ndeleng bab-bab kang bisa dibedakake lan uga dipadhanake.

Istilah sastra bandhingan terjemahan saka basa Inggris, *comparative literature*, utawa saka basa Perancis, *la litterature comparee*. Miturut sejaraha, sastra bandhingan minangka ilmu kang nduweni rong aliran. Aliran kapisan yaiku aliran Perancis kang diarani *aliran lama*, diarani kaya mangkono amarga sastra bandhingan lair ing negara Perancis lan dipelopori dening para pamikir Perancis. Aliran kapindho diarani aliran Amerika uga diarani *aliran baru*. Tegese sastra bandhingan yaiku ilmu sastra kang nyinaoni ngenani karya sastra kang nduweni asal negara beda, kabudayan kang beda lan nduweni basa kang beda. Ora mung iku, sastra bandhingan uga bisa mbandhingake karya sastra kang negarane padha nanging basa lan pangriptane beda (Hutomo, 1993:3).

Endraswara (2011:129) ngandharake yen panliten sastra kanthi nggunakake kajian sastra bandhingan bakal bisa ndeleng sesambungan antara karya sastra siji lan karya sastra liya kang dibandhingake. Sastra bandhingan ing kene bakal ngonceki bab kang padha lan bab kang beda sajrone crita. Pepadhane yaiku bab crita kang diandharake. Novel PPP lan CCE padha-padha ngandharake kepriye panguripan paraga wanitane kang nduweni semangat feminisme. Salah sawiji tuladha sajrone novel PPP kaya ing ngisor iki.

“Allah, Ibuk! Saben-saben ngono! Saben-saben ngono! Dupeh cah wedok ngene ora oleh, ngene ora oleh. Sapa, ta, sing crita arep demonstrasi?” Wis nggenah sing crita ora jangkep, duwe versi liya, ora kaya ancane Ngesthiratu. (PPP, 2013:20)

Ngesthiratu minangka wong wadon kang isih enom lan ora gelem diwatesi kebebasan dening sapa wae. Dheweke kepingin dadi wanita kang mandhiri lan ora dikehang. Ngesthiratu ora kepingin amarga dheweke wadon kabebasan anggone nindakake apa wae kang dipengini diwatesi. Kutipan ing ndhuwur cetha yen novel PPP ngandhut babagan feminisme lan nduweni *setting* nalika Indonesia lagi geger-gegere dhemonstrasi amarga krisis moneter. Ing ngisor iki uga bakal diandharake salah sawiji tuladha kutipan sajrone novel CCE kang ngandharake yen novel CCE nyritakake semangat feminisme paraga wanitane.

*Ditempat tugasnya di Semarang, Ayah jatuh cinta pada seorang perempuan yang berambut pendek, memakai rok selutut, dan bersepatu pantovel yang baginya adalah perwujudan modernitas dan keterpelajaran. (CCE, 2012:106)*

Nalika isih rumaja utawa prawan, Syrnje Masmirah minangka wujud gegambaran modherenitas lan *keterpelajaran*. Dheweke beda banget karo wanita liyane ing jaman kasebut. Kutipan kasebut uga ngandharake yen CCE uga nyritakake paraga wanitane kang nggambarake gerakan feminisme.

Pepadhan liyane yaiku nduweni latar belakang kang padha yaiku disambungake karo kedadayan penting ing jaman mbiyen kang saiki dadi sejarahe Indonesia. Saliyane pepadhan, kang njalari crita novel loro iki cocog banget dititngi nggunakake kajian sastra bandhingan yaiku sipate kang *kontradiktif*. Kontradiktif ing kene kang bakal narik kawigatene kajian sastra bandhingan, awit keloro novel iki kapisan nggunakake basa kang beda, kapindhone yaiku bakal dijlentrehake kepriye bedane crita kanthi ngonjokake paraga wanita kang critane diserat dening pangripta priya lan ngonjokake paraga priya tanpa ngasorake paraga wanita kang critane diserat dening pangripta wanita. Kaloro novel kasebut uga narik kawigaten panliti amarga babagan kang diandharake ngenani kahanan wong wadon ing jaman reformasi. ing jaman saiki ora akeh pangripta kang ngripta karya sastra nggunakake *setting* ing jaman reformasi, saengga saka *setting* lan perkara kang diangkat dening pangripta, kaloro novel iki narik kawigaten panliti.

## 1.2 Wewatesane Panliten

Wewatesan panliten nduweni piguna supaya objek panliten ing kene bisa fokus lan panjlentrehe ora teka ngendi-endi ngluwahi apa kang dadi underane panliten. Wewatesane panliten iki winates ngandharake ngenani kalungguhane paraga wanita sajrone novel PPP anggitané Suparto Brata lan novel CCE anggitané Ayu Utami kanthi nggunakake kajian sastra bandhingan.

### 1.3 Underane Panliten

Sacara umum kang dadi underane panliten iki yaiku mbandhingake motif-motif kang ana sajrone novel PPP lan CCE. Adhedhasar lelandhesan panliten, mula underane kaya ing ngisor iki:

- (1) Kepriye *peran* lan kalungguhane paraga wanita sajrone novel PPP lan CCE?
- (2) Kepriye pangaribawane paraga wanita tumrap pawongan kang ana ing sakupenge sajrone novel PPP lan CCE?
- (3) Kepriye asile bandhingan sajrone novel PPP lan CCE?

### 1.4 Tujuwane Panliten

Adhedhasar underane panliten ing ndhuwur, mula panliten iki nduweni tujuan:

- (1) Ngandharake *peran* lan kalungguhane paraga wanita sajrone PPP lan CCE.
- (2) Ngandharake pangaribawane paraga wanita tumrap pawongan kang ana ing sakupenge sajrone novel PPP lan CCE.
- (3) Ngandharake asile bandhingan sajrone novel PPP lan CCE.

### 1.5 Paedahe Panliten

Panliten iki dikarepake bisa migunani tumrap ilmu kasusastran, mligine ing kasusastran Jawa modheren. Mula saka iku, paedahe panliten iki yaiku:

- (1) Tumrap Panliti

Panliten iki bisa nambahi pengalaman lan kawruh ngenani kalungguhane paraga wanita sajrone karya sastra karya anak bangsa. Panliten iki uga dikarepake bisa menehi sumbangan tumrap panliten sastra kanthi tingingan sastra bandhingan.

- (2) Tumrap Pasinaonan Sastra

Panliten iki minangka dalan ngrembakake kawruh, mligine pasinaonan sastra bandhingan, lan wujud nglaturi pangrembakane sastra lan budaya Jawa. Panliten iki uga bisa digunakake kanggo sarana bahan pamulangan kang ana ing sekolah-sekolah.

(3) Pamaca

Panliten iki bisa dadi referensi lan motivasi tumrap panliti sastra liyane, mligine babagan sastra bandhingan. Panliten iki uga diajab kanggo ngrembakakake kasusatan Jawa.

### 1.6 Panjlentrehe Tetembungan

Panliten iki nggunakake panjlentrehe tetembungan supaya panliti lan pamaca ora salah tampa anggone ngerteni apa kang dirembug sajrone panliten iki. Panjlentrehe tetembungan digunakake supaya ora uwal saka konsep panliten, mula panjlentrehe tetembungan ing panliten iki, yaiku:

**Feminisme:** Gerakan kaum wanita kanggo nolak sakabehane wujud diasorake dening kabudayan kang wis ana sajrone bidhang politik, ekonomi, lan sajrone panguripan (Ratna, 2013:84).

**Gender:** Mosse (sajrone Darni, 2013:25) ngandharake yen *gender* yaiku piranti kanggo moles lakon kasebut kayata kapribadhen, pangupa jiwa, seksualitas, lsp.

**Peran:** *sudut pandang* sajrone sosiologi lan psikologi sosial kang ngandharake yen tumindak manungsa ditumindakake dening kategori-kategori sosial (kayata ibu, guru, polisi). *Peran* lan kalungguhan ora bisa dipisahake. (<https://id.m.wikipedia.org>)

**Kalungguhan:** status kang diduweni saben pawongan sajrone klompok sosial (organisasi-komunitas).



Kalungguhan ora bisa dipisahake karo *peran*, dene *peran* uga ora bisa dipisahake karo kalungguhane. Kalorone nduweni gegayutan (<https://id.m.wikipedia.org>)